



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

იოანე ფლორენციელი

იოანე ფლორენციელი (გ. 1348), დომინიკელი ბერი, თბილისის კათოლიკური საეპისკოპოსოს პირველი ეპისკოპოსი (1329). შედიოდა იმ კათოლიკე მისიონერთა სიაში, რ-ებიც საქართველოში მოღვაწეობდნენ.

ი. ფ. საქართველოში თბილისის კათოლიკური საეპისკოპოსოს დაარსებამდე, დაახლ. 1318 ჩამოვიდა. ცნობები მისი პიროვნების შესახებ ძალზე მწირია. რომის პაპის, იოანე XXII-ის წერილიდან ვგებულობთ, რომ იგი დიდად განათლებული, მოკრძალებული და სათნოებით გამორჩეული პიროვნება ყოფილა.

ი. ფ-ს საფუძვლიანად ჰქონდა შესწავლილი საღვთო საგნები, კარგად იცოდა ქართული ენა და ქართ. ადათ-წესები; იგი სიყვარულით სარგებლობდა როგორც ქართველებში, ასევე საქართველოში მცხოვრებ არაქრისტიანებს შორისაც. მის სახელს უკავშირდება არაერთი წიგნის ქართულ ენაზე თარგმნა, თუმცა არც ერთ მათგანს ჩვენამდე არ მოუღწევია. ი. ფ-ს კათოლიკე ეკლესია დიდ მოღვაწედ და „მოციქულად ასახელებს.

ლიტ.: თ ა მ ა რ ა შ ვ ი ლ ი მ., ქართული ეკლესიის ისტორია, თბ., 1995; მ ჭ ე დ ლ ი ძ ე გ., XIX საუკუნის გამოუქვეყნებელი ისტორიული დოკუმენტები ქუთაისში მოღვაწე იტალიელი პატრების შესახებ, «ქართველოლოგია», 2015, N4.

თ. მარგველაშვილი
